



საქართველოს რკინიგზა როგორც ინსტიტუციური მეხსიერება: ემოციური კავშირი, მრავალთაობიანი დასაქმება და სტრუქტურული ოპტიმიზაცია

DOI:10.36962/ECS108/1-3/2026-56

ზურაბ ნასარაია

საჯარო მმართველობის დოქტორი,
სტუ ასოცირებული პროფესორი

თეიმურაზ ტვილდიანი

ტექნიკურ მეცნიერებათა კანდიდატი

რეზიუმე

განხილულია საქართველოს რკინიგზა, როგორც ინსტიტუციური მეხსიერების მატარებელი ორგანიზაცია, სადაც მრავალთაობიანი დასაქმება და ემოციური კავშირი მნიშვნელოვან როლს ასრულებს ორგანიზაციული იდენტობის ფორმირებასა და სტრუქტურული ოპტიმიზაციის პროცესების აღქმაში. კვლევა ეფუძნება იმ ვარაუდს, რომ სახელმწიფო ინფრასტრუქტურულ ორგანიზაციებში ორგანიზაციული ცვლილებები ვერ განხილდება მხოლოდ ტექნიკურ ან ეკონომიკურ ჭრილში, როდესაც ორგანიზაცია ხასიათდება ხანგრძლივი ისტორიული უწყვეტობითა და ძლიერი სოციალური კავშირებით.

გამოყენებულია კვლევის თვისებრივი მეთოდოლოგია, მათ შორის სიღრმისეულ ინტერვიუები მრავალთაობიანი დასაქმების მქონე ოჯახების წარმომადგენლებთან, ნარატიული და თემატურ ანალიზი, ასევე დოკუმენტური და ინსტიტუციური წყაროების ანალიზი. ემპირიული შედეგები აჩვენებს, რომ მრავალთაობიანი დასაქმება მოქმედებს როგორც ინსტიტუციური მეხსიერების გადაცემის მექანიზმი, რომელიც აძლიერებს ემოციურ კავშირსა და ლოიალობას ორგანიზაციის მიმართ, თუმცა ამავე დროს ზრდის სტრუქტურული ცვლილებებისადმი წინააღმდეგობის ალბათობას.

კვლევა ავლენს ინსტიტუციური მეხსიერებისა და ემოციური კაპიტალის ორმაგ როლს როგორც ორგანიზაციული სტაბილურობის რესურსს და როგორც რეორგანიზაციის პროცესში პოტენციურ ბარიერს. დასაბუთებულია, რომ სტანდარტული რეორგანიზაციის მოდელები ხშირად ვერ ითვალისწინებს ამ სოციალურ და ემოციურ ფაქტორებს, რაც ამცირებს ოპტიმიზაციის ეფექტიანობას. კვლევა ასკვნის, რომ ადამიანზე ორიენტირებული ოპტიმიზაციის მოდელი, რომელიც აინტეგრირებს ინსტიტუციურ მეხსიერებასა და ემოციურ კაპიტალს, ქმნის უფრო მდგრად და ლეგიტიმურ საფუძველს ორგანიზაციული ტრანსფორმაციისთვის.

საკვანძო სიტყვები: საქართველოს რკინიგზა, ინსტიტუციური მეხსიერება, ემოციური კაპიტალი, მრავალთაობიანი დასაქმება, სტრუქტურული ოპტიმიზაცია, ინფრასტრუქტურა.

შესავალი

საქართველოს რკინიგზა წარმოადგენს ქვეყნის ერთ-ერთ უმნიშვნელოვანეს ინფრასტრუქტურულ ინსტიტუტს, რომლის ფორმირებამ და განვითარებამ განსაზღვრული როლი შეასრულა საქართველოს ეკონომიკური სივრცის ინტეგრაციასა და სოციალურ-ტერიტორიული ურთიერთობების ჩამოყალიბებაში. მისი ისტორიული განვითარება მჭიდროდ არის დაკავშირებული ქვეყნის ეკონომიკური ტრანსფორმაციის ეტაპებთან, სატრანზიტო ფუნქციის გაძლიერებასთან და რეგიონული კავშირების ინტენსიფიკაციასთან. ამ თვალსაზრისით, რკინიგზა არ შემოიფარ-

რგლება მხოლოდ სატრანსპორტო სისტემის ფუნქციით და განიხილება როგორც სტრატეგიული მნიშვნელობის მქონე სახელმწიფო ინსტიტუტი, რომელიც გავლენას ახდენს ეკონომიკურ სტაბილურობასა და სოციალურ სტრუქტურაზე.

ისტორიულად საქართველოს რკინიგზის საქმიანობა სცდებოდა მხოლოდ ტექნიკურ და ლოგისტიკურ ამოცანებს და მოიცავდა დასაქმების, პროფესიული მომზადებისა და სოციალური სტაბილურობის უზრუნველყოფის მნიშვნელოვან კომპონენტებს. სხვადასხვა რეგიონში იგი ჩამოყალიბდა როგორც ერთ-ერთი ძირითადი დამსაქმებელი, რაც ხელს უწყობდა ადგილობრივი ეკონომიკური აქტივობის ზრდას და მოსახლეობის სოციალურ მობილობას. ამ პროცესმა განაპირობა რკინიგზის განსაკუთრებული ადგილი ქვეყნის სოციალურ სტრუქტურაში და მისი აღქმა როგორც გრძელვადიანი, სტაბილური და პროგნოზირებადი ინსტიტუტისა, რომელთან დაკავშირებაც ხშირად სცდებოდა ინდივიდუალური ეკონომიკური ინტერესების საზღვრებს.

აღნიშნული კონტექსტის ფარგლებში განსაკუთრებულ მნიშვნელობას იძენს მრავალთაობიანი დასაქმების ფენომენი, რომელიც საქართველოს რკინიგზისთვის დამახასიათებელ სტაბილურ სოციალურ პრაქტიკად ჩამოყალიბდა. ერთსა და იმავე ორგანიზაციაში რამდენიმე თაობის თანმიმდევრული ან პარალელური დასაქმება ქმნიდა პროფესიული ცოდნის, სამუშაო ეთიკისა და ორგანიზაციული ნორმების არაფორმალური გადაცემის მექანიზმებს. შედეგად, რკინიგზაში დასაქმება ხშირად აღიქმებოდა არა მხოლოდ როგორც ინდივიდუალური კარიერული არჩევანი, არამედ როგორც ოჯახური შრომითი მემკვიდრეობა, რაც აძლიერებდა თანამშრომელთა კუთვნილების გრძნობას და ორგანიზაციულ ლოიალობას.

ამგვარმა ხანგრძლივმა და სტაბილურმა დასაქმების პრაქტიკამ ხელი შეუწყო ინსტიტუციური მეხსიერების ჩამოყალიბებას, რომელიც ეფუძნებოდა დაგროვილ გამოცდილებას, პრაქტიკულ ცოდნასა და განმეორებად სამუშაო პროცესებს. საქართველოს რკინიგზა ამ თვალსაზრისით შეიძლება განიხილებოდეს როგორც ინსტიტუციური მეხსიერების მატარებელი ორგანიზაცია, სადაც ცოდნისა და გამოცდილების გადაცემა ხდებოდა არა მხოლოდ ფორმალური დოკუმენტებისა და ინსტრუქციების მეშვეობით, არამედ ყოველდღიური სამუშაო პრაქტიკისა და არაფორმალური სოციალური ურთიერთობების გზით. ინსტიტუციური მეხსიერება უზრუნველყოფდა ოპერაციული პროცესების უწყვეტობას და სტაბილურობას, თუმცა ამავე დროს აყალიბებდა ორგანიზაციული ინერციის გარკვეულ ფორმებს.

თანამედროვე ეტაპზე, როდესაც საქართველოს რკინიგზა დგას სტრუქტურული ოპტიმიზაციისა და ორგანიზაციული რეორგანიზაციის აუცილებლობის წინაშე, ინსტიტუციური მეხსიერებისა და მრავალთაობიანი დასაქმების გავლენა იძენს განსაკუთრებულ აქტუალობას. ცვლილებების დაგეგმვა ასეთ კონტექსტში ეხება არა მხოლოდ ფორმალურ სტრუქტურებსა და მენეჯერულ მოდელებს, არამედ ხანგრძლივად ჩამოყალიბებულ სოციალურ პრაქტიკებს, პროფესიულ იდენტობებსა და ემოციურ კავშირებს ორგანიზაციის მიმართ. ეს გარემოება ქმნის კომპლექსურ ანალიტიკურ ჩარჩოს, სადაც ეფექტიანობის ზრდისა და ოპტიმიზაციის მიზნები უნდა შეფასდეს სოციალური და ინსტიტუციური ფაქტორების გათვალისწინებით.

კვლევის მიზანია საქართველოს რკინიგზის გააზრება როგორც ინსტიტუციური მეხსიერების მატარებელი ორგანიზაციისა და იმ სოციალური მექანიზმების ანალიზი, რომლებიც ჩამოყალიბდა მრავალთაობიანი დასაქმებისა და ემოციური კავშირის საფუძველზე. კვლევა ავსებს არსებულ ლიტერატურაში არსებულ ხარვეზს, რომელიც სახელმწიფო ინფრასტრუქტურული ორგანიზაციების რეორგანიზაციას უმეტესად ტექნიკურ ან მენეჯერულ ჭრილში განიხილავს და ნაკლებ ყურადღებას უთმობს სოციალურ და ემოციურ განზომილებებს. ამდენად, იგი აქტუალურ ანალიტიკურ საფუძველს ქმნის ისეთი სტრუქტურული ოპტიმიზაციის მოდელის გააზრებისთვის, რომლებიც ითვალისწინებს ინსტიტუციური მეხსიერების როლს და ამცირებს ორგანიზაციული ცვლილებების სოციალურ ხარჯებს.

ნაშრომი ეფუძნება ურთიერთდაკავშირებული კვლევითი კითხვების სისტემას, რომელიც მიმართულია საქართველოს რკინიგზის, როგორც ინსტიტუციური მეხსიერების მატარებელი ორ-

განიზაციის, კომპლექსური გააზრებისკენ. კერძოდ, თუ როგორ ფუნქციონირებს საქართველოს რკინიგზა, როგორც ინსტიტუციური მეხსიერების მატარებელ ორგანიზაცია და რა გავლენას ახდენს ეს მეხსიერება სტრუქტურული ოპტიმიზაციისა და რეორგანიზაციის პროცესებზე. ამასთან, კვლევა იკვლევს, როგორ ფორმირდება და გადაეცემა ემოციური კავშირი ორგანიზაციის მიმართ მრავალთაობიანი დასაქმების პირობებში და რა როლს ასრულებს ოჯახური შრომითი ტრადიცია ორგანიზაციული და პროფესიული იდენტობის ჩამოყალიბებაში. განსაკუთრებული ყურადღება ეთმობა იმას, თუ როგორ მოქმედებს ინსტიტუციური მეხსიერება ცვლილებების მიღებასა და წინააღმდეგობის ფორმირებაზე და რა სოციალური და ორგანიზაციული რისკები ახლავს სტრუქტურულ ოპტიმიზაციას იმ შემთხვევაში, როდესაც ემოციური ფაქტორი უგულვებელყოფილია. ასევე შესაძლებელია თუ არა ოპტიმიზაციის ისეთი მოდელის ჩამოყალიბება, რომელიც ემოციურ კაპიტალს არ განიხილავს როგორც ცვლილებების ბარიერს, არამედ გარდაქმნის მას ორგანიზაციული ეფექტიანობის სტრატეგიულ რესურსად.

აღნიშნული კვლევითი კითხვები სრულად არის დაფარული სტატიის სტრუქტურაში ინტეგრირებული ანალიზის გზით. თეორიული ჩარჩო და ლიტერატურის მიმოხილვა უზრუნველყოფს კონცეპტუალურ საფუძველს დასმული კითხვების გააზრებისთვის. ემპირიული ნაწილი ავლენს მათ კონკრეტულ გამოვლინებებს საქართველოს რკინიგზის ინსტიტუციურ პრაქტიკაში. ხოლო განხილვის, პოლიტიკისა და მენეჯმენტის რეკომენდაციების ნაწილები აერთიანებს თეორიულ და ემპირიულ მიგნებებს შეფასებით ჩარჩოში, რაც ქმნის ერთიან ანალიტიკურ ლოგიკას თეორიულ, ემპირიულ და პრაქტიკულ დონეებს შორის.

ძირითადი ტექსტი

ინსტიტუციური მეხსიერება ორგანიზაციული კვლევების ფარგლებში განიხილება როგორც დაგროვილი ცოდნის, გამოცდილების, ნორმებისა და პრაქტიკების ერთობლიობა, რომელიც ორგანიზაციის ფუნქციონირებას დროით განზომილებაში უზრუნველყოფს (Walsh & Ungson, 1991; Argote, 2013). ლიტერატურაში ინსტიტუციური მეხსიერება დაკავშირებულია ორგანიზაციული უწყვეტობის, სტაბილურობისა და პროგნოზირებადობის უზრუნველყოფასთან, განსაკუთრებით იმ ორგანიზაციებში, რომლებიც ხანგრძლივი ისტორიული განვითარების გზით ჩამოყალიბდნენ (Levitt & March, 1988). ორგანიზაციული იდენტობის კონცეფციასთან მიმართებით, ინსტიტუციური მეხსიერება ქმნის საფუძველს კოლექტიური თვითაღქმისთვის, რომლის მეშვეობითაც ორგანიზაციის წევრები განსაზღვრავენ საკუთარ როლს, პროფესიულ ღირებულებებსა და კუთვნილებას (Albert & Whetten, 1985; Hatch & Schultz, 2002). ამ კონტექსტში, ინსტიტუციური მეხსიერება არ წარმოადგენს მხოლოდ წარსულის გამოცდილების არქივს, არამედ მოქმედ ფაქტორს, რომელიც გავლენას ახდენს მიმდინარე გადაწყვეტილებებსა და სტრატეგიულ არჩევანზე (March, 1991).

ორგანიზაციული იდენტობა, როგორც კოლექტიური კონსტრუქცია, ფორმირდება არა მხოლოდ ფორმალური მისიისა და სტრატეგიული დოკუმენტების საფუძველზე, არამედ ყოველდღიური პრაქტიკისა და განმეორებადი ქცევების შედეგად (Gioia, Schultz, & Corley, 2000). კვლევები მიუთითებს, რომ ძლიერი ინსტიტუციური მეხსიერის მქონე ორგანიზაციებში იდენტობა უფრო სტაბილურია, თუმცა ამავე დროს ნაკლებად მოქნილი (Gioia et al., 2013). ეს დუალობა განსაკუთრებით თვალსაჩინოა სახელმწიფო და ინფრასტრუქტურულ ორგანიზაციებში, სადაც ისტორიული გამოცდილება და წარსული პრაქტიკა მნიშვნელოვან როლს ასრულებს ორგანიზაციული ქცევის ფორმირებაში (Peters, 2010).

ემოციური კაპიტალის კონცეფცია ორგანიზაციულ ანალიზში გამოიყენება იმ არამატერიალური რესურსების აღსაწერად, რომლებიც დაკავშირებულია ემოციებთან, ურთიერთობებთან და კუთვნილების განცდასთან (Bourdieu, 1986; Nowotny, 1981). სახელმწიფო და ინფრასტრუქტურულ ორგანიზაციებში ემოციური კაპიტალი ხშირად წარმოიშობა ხანგრძლივი დასაქმების, სტაბილური შრომითი ურთიერთობებისა და სოციალური უსაფრთხოების მოლოდინის საფუძველზე (Hochschild, 1983; Fineman, 2003). ლიტერატურა ხაზს უსვამს, რომ ასეთი ტიპის ორგანიზაციებში

თანამშრომელთა ემოციური ჩართულობა შეიძლება იქცეს როგორც ეფექტიანობის მხარდამჭერ ფაქტორად, ასევე ცვლილებებისადმი წინააღმდეგობის წყაროდ (Voronov & Vince, 2012). ემოციური კაპიტალი ამ შემთხვევაში ფუნქციონირებს როგორც სოციალური ნეო, რომელიც აძლიერებს შიდა კოორდინაციას, თუმცა ამავე დროს ამცირებს ორგანიზაციული ტრანსფორმაციის ტემპს (Kunda, 2006).

მრავალთაობიანი დასაქმება და შრომითი მემკვიდრეობა განიხილება როგორც სოციალური პრაქტიკა, რომლის მეშვეობითაც პროფესიული იდენტობა და სამუშაო ნორმები თაობებს შორის გადაეცემა (Bertaux & Thompson, 2007). არსებული კვლევები მიუთითებს, რომ ერთსა და იმავე ორგანიზაციაში რამდენიმე თაობის დასაქმება ქმნის არაფორმალურ ცოდნის გადაცემის სტაბილურ არხებს და აძლიერებს ორგანიზაციულ ლოიალობას (Cappellari & Tatsiramos, 2015). ამასთანავე, შრომითი მემკვიდრეობა ხშირად უკავშირდება ორგანიზაციული საზღვრების დახურულობას და გარე გამოცდილების შეზღუდულ ინტეგრაციას (Granovetter, 1985). შედეგად, მრავალთაობიანი დასაქმება შეიძლება ერთდროულად განიხილებოდეს როგორც ინსტიტუციური მეხსიერების გამაძლიერებელი და როგორც ორგანიზაციული ინერციის განმაპირობებელი ფაქტორი (Stinchcombe, 1965).

სტრუქტურული ოპტიმიზაციისა და ორგანიზაციული ინერციის ურთიერთკავშირი ერთ-ერთ ცენტრალურ თემად რჩება ორგანიზაციულ კვლევებში (Hannan & Freeman, 1984). სტრუქტურული ოპტიმიზაცია, როგორც წესი, მიმართულია ეფექტიანობის ზრდაზე, რესურსების რაციონალურ გამოყენებასა და მენეჯმენტის თანამედროვე მოდელების დანერგვაზე (Mintzberg, 2009). თუმცა ლიტერატურა მიუთითებს, რომ ძლიერი ინსტიტუციური მეხსიერისა და ემოციური კაპიტალის მქონე ორგანიზაციებში ოპტიმიზაციის პროცესები ხშირად ხვდება ფორმალურ და არაფორმალურ წინააღმდეგობას (Kotter, 1996). ორგანიზაციული ინერცია ამ შემთხვევაში წარმოიშობა არა მხოლოდ სტრუქტურული სიმყარიდან, არამედ ღრმად ფესვგადგმული სოციალური პრაქტიკებიდან და პროფესიული იდენტობებიდან (Pierson, 2000).

საქართველოს რკინიგზის, როგორც ისტორიულად ჩამოყალიბებული და სტრატეგიულად მნიშვნელოვანი ორგანიზაციის, კვლევა ადგილობრივ აკადემიურ სივრცეში ძირითადად კონცენტრირებულია მის ეკონომიკურ, სატრანზიტო და ტექნიკურ ფუნქციებზე. დ. სიღამონიძის ნაშრომი საქართველოს რკინიგზის სამხრეთ კავკასიის სატრანსპორტო დერეფანში ინტეგრაციის შესახებ აყალიბებს რკინიგზას არა მხოლოდ ინფრასტრუქტურულ ელემენტად, არამედ გრძელვადიანი სახელმწიფოებრივი განვითარების მატარებელ ინსტიტუტად, რომლის ფუნქციონირება ისტორიულ მეხსიერებასა და ინსტიტუციურ უწყვეტობას ეფუძნება. ეს ხედვა მნიშვნელოვან საფუძველს ქმნის რკინიგზის ორგანიზაციული იდენტობისა და ინსტიტუციური მეხსიერების გააზრებისთვის.

დ. გონდაურისა და მ. მოისწრაფიშვილის მიერ შესრულებული სტატისტიკური და ფინანსური ანალიზები საქართველოს რკინიგზის საქმიანობის სხვადასხვა ეტაპზე აჩვენებს, რომ ორგანიზაციის ეფექტიანობა და სტრუქტურული მდგრადობა მჭიდროდაა დაკავშირებული არა მხოლოდ ეკონომიკურ მაჩვენებლებთან, არამედ შიდა ორგანიზაციულ ლოგიკასთან და დაგროვილ გამოცდილებასთან. აღნიშნული კვლევები ირიბად მიუთითებს იმაზე, რომ სტრუქტურული ცვლილებები, რომლებიც მხოლოდ ფინანსურ ოპტიმიზაციაზეა ორიენტირებული, ხშირად ვერ ითვალისწინებს ორგანიზაციის სოციალურ და ადამიანურ განზომილებებს, რაც კვლევის ამოცანებისათვის კრიტიკულად მნიშვნელოვანია.

უსაფრთხოების კულტურაზე ფოკუსირებული ბ. გეცაძისა და ა. შარვაშიძის ნაშრომი ავლენს, რომ საქართველოს რკინიგზაში ტექნიკური ინოვაციები წარმატებულია მხოლოდ იმ შემთხვევაში, როდესაც ისინი ეყრდნობა ჩამოყალიბებულ პროფესიულ ეთოსს, შრომით დისციპლინას და თაობებს შორის გადაცემულ სამუშაო ღირებულებებს. ეს კვლევა მნიშვნელოვან საფუძველს ქმნის ემოციური კაპიტალისა და შრომითი მემკვიდრეობის გააზრებისთვის, როგორც არამატერიალური რესურსების, რომლებიც პირდაპირ მოქმედებს ორგანიზაციული ცვლილებების მიღებაზე.

გ. გიგუაშვილისა და მ. სადალაშვილის ნაშრომი საქართველოს როლზე შუა დერეფნისა და აბრეშუმის გზის თანამედროვე ინტერპრეტაციაში ხაზს უსვამს რკინიგზის ისტორიულ უწყვეტობასა და სიმბოლურ მნიშვნელობას. ავტორები წარმოაჩენენ რკინიგზას, როგორც კოლექტიური მეხსიერებისა და ეროვნული იდენტობის ნაწილს, რაც ამ კვლევაში განხილულ მრავალთაობიან დასაქმებასა და ოჯახური შრომითი ტრადიციების თემასთან პირდაპირ კავშირშია.

მიუხედავად აღნიშნული ნაშრომების მნიშვნელოვანი წვლილისა, ადგილობრივ აკადემიურ ლიტერატურაში ნაკლებად არის წარმოდგენილი საქართველოს რკინიგზის ანალიზი ინსტიტუციური მეხსიერების, ემოციური კაპიტალისა და მრავალთაობიანი დასაქმების ურთიერთკავშირში. სწორედ ამ სიცარიელის შევსებას ისახავს მიზნად წარმოდგენილი კვლევა, რომელიც არსებულ ეკონომიკურ, ტექნიკურ და სტრატეგიულ ანალიზებს ავსებს ორგანიზაციული სოციოლოგიისა და შრომის სოციოლოგიის თეორიული ჩარჩოებით და საქართველოს რკინიგზის შემთხვევას განიხილავს როგორც კომპლექსურ სოციალურ ინსტიტუტს.

ამ თეორიული ჩარჩოს ფარგლებში საქართველოს რკინიგზა შეიძლება გაანალიზდეს როგორც ორგანიზაცია, სადაც ინსტიტუციური მეხსიერება, ემოციური კაპიტალი და მრავალთაობიანი დასაქმება ერთმანეთთან მჭიდროდ არის გადაჯაჭვული. აღნიშნული ურთიერთკავშირი ქმნის სპეციფიკურ ორგანიზაციულ დინამიკას, რომლის გათვალისწინება აუცილებელია სტრუქტურული ოპტიმიზაციის პროცესების გააზრებისთვის. შესაბამისად, თეორიული ჩარჩო აყალიბებს ანალიტიკურ საფუძველს იმის დასადგენად, თუ როგორ შეიძლება ორგანიზაციული ინერციის დაძლევა ინსტიტუციური მეხსიერებისა და ემოციური რესურსების სრული უგულებელყოფის გარეშე.

კვლევის შედეგებში ნაჩვენებია, რომ საქართველოს რკინიგზა თანამშრომლებისთვის ფუნქციონირებს არა მხოლოდ როგორც სამუშაო ორგანიზაცია, არამედ როგორც პროფესიული და ოჯახური იდენტობის ჩამომყალიბებელი სოციალური სივრცე. სიღრმისეული ინტერვიუების ანალიზი მიუთითებს, რომ რკინიგზაში დასაქმება ხშირად აღიქმება როგორც ოჯახის შრომითი ისტორიის გაგრძელება და არა ინდივიდუალური კარიერული გადაწყვეტილება. მრავალ შემთხვევაში რესპონდენტები საკუთარ პროფესიულ თვითაღქმას აკავშირებდნენ ოჯახის უფროსი წევრების გამოცდილებასთან, რაც აყალიბებდა პროფესიისადმი ადრეულ ინტერესს და წინასწარ განსაზღვრულ სამუშაო ტრაექტორიას. აღნიშნული მიგნება თანხვედრაშია საქართველოს რკინიგზის შიდა ნარატივებთან, სადაც ხაზგასმულია ორგანიზაციის ისტორიული როლი პროფესიული ტრადიციების შენარჩუნებაში (Georgian Railway, 2019; Georgian Railway, 2022).

მიღებული მონაცემებით ასევე დასტურდება, რომ ემოციური კავშირი და ლოიალობა ორგანიზაციის მიმართ წარმოადგენს საქართველოს რკინიგზის შრომითი ურთიერთობების ერთ-ერთ ცენტრალურ მახასიათებელს. რესპონდენტების უმრავლესობა რკინიგზას აღწერს როგორც სტაბილურ და სანდო ინსტიტუტს, რომელიც ასოცირდება არა მხოლოდ შემოსავლის წყაროსთან, არამედ სოციალურ დაცვასთან, კოლექტიურ მხარდაჭერასა და პროფესიულ ღირსებასთან. აღნიშნული ემოციური კავშირი ხშირად განპირობებულია ხანგრძლივი დასაქმებითა და ორგანიზაციისადმი ნდობის გამოცდილებით, რაც აძლიერებს თანამშრომელთა ლოიალობას და ამცირებს კადრების გადინების მაჩვენებელს. მსგავსი დამოკიდებულებები დაფიქსირებულია როგორც ინტერვიუებში, ისე ორგანიზაციის ოფიციალურ ანგარიშებში, სადაც ხაზგასმულია თანამშრომელთა ხანგრძლივი სტაჟი და ორგანიზაციული ერთგულება. (Georgian Railway, 2018; Ministry of Economy and Sustainable Development of Georgia, 2021).

მრავალთაობიანი დასაქმება კვლევის ფარგლებში გამოვლინდა როგორც ინსტიტუციური მეხსიერების ერთ-ერთი მთავარი მექანიზმი. ინტერვიუების შედეგად დადგინდა, რომ პროფესიული ცოდნის, სამუშაო წესებისა და არაფორმალური ნორმების გადაცემა ხშირად ხდებოდა ოჯახური ურთიერთობების მეშვეობით, რაც ავსებდა ფორმალურ ტრენინგებსა და ინსტრუქციებს. ასეთი გადაცემის პრაქტიკა უზრუნველყოფდა სამუშაო პროცესების უწყვეტობას და ამცირებდა ოპერაციულ გაურკვევლობებს, განსაკუთრებით ტექნიკურად კომპლექსურ პოზიციებზე. აღნიშნული შედეგი თანხვედრაშია რკინიგზის შიდა დოკუმენტებში ასახულ მიდგომებთან, სადაც გა-

მოცდილ თანამშრომელთა როლი განიხილება როგორც ორგანიზაციული ცოდნის შენარჩუნების მნიშვნელოვანი რესურსი (Georgian Railway, 2020).

ამავე დროს, კვლევამ ცხადყო, რომ ძლიერი ემოციური კავშირი და მრავალთაობიანი შრომითი ტრადიცია ქმნის სტრუქტურული ცვლილებებისადმი ემოციურ და სოციალურ წინააღმდეგობას. რესპონდენტთა ნაწილი რეორგანიზაციას აღიქვამს როგორც საფრთხეს არა მხოლოდ სამუშაო ადგილებისთვის, არამედ ორგანიზაციის ისტორიული იდენტობისთვის. ცვლილებების მიმართ სკეპტიკური დამოკიდებულება ხშირად უკავშირდება წარსულ გამოცდილებას, როდესაც ოპტიმიზაციის პროცესები ასოცირდებოდა სტაბილურობის დაკარგვასთან ან სოციალური გარანტიების შემცირებასთან. აღნიშნული წინააღმდეგობა, როგორც ემპირიული მონაცემები აჩვენებს, არ არის მხოლოდ ინდივიდუალური რეაქცია, არამედ კოლექტიური ნარატივის ნაწილი, რომელიც დამკვიდრებულია ორგანიზაციის შიდა სოციალურ ქსელებში. მსგავსი დინამიკა აისახება საქართველოს რკინიგზის რეფორმების ირგვლივ არსებულ საჯარო დისკუსიებშიც, სადაც სტრუქტურული ცვლილებები ხშირად განიხილება სოციალურ რისკებთან კავშირში (World Bank, 2020; Georgian Railway, 2021).

ამრიგად, კვლევის შედეგებში მითითებულია, რომ საქართველოს რკინიგზის ორგანიზაციული ფუნქციონირება განისაზღვრება პროფესიული იდენტობის, ემოციური კაპიტალისა და ინსტიტუციური მეხსიერის მჭიდრო ურთიერთქმედებით. აღნიშნული ფაქტორები ერთდროულად ქმნის სტაბილურობის საფუძველს და აყალიბებს სტრუქტურული ოპტიმიზაციისადმი წინააღმდეგობის სოციალურ ჩარჩოს, რაც აუცილებელს ხდის ცვლილებების დაგეგმვისას სოციალური და ემოციური განზომილებების სისტემურ გათვალისწინებას.

კვლევის შედეგების კონტექსტუალურად გააზრებამ აჩვენა, რომ სისტემა, რომელიც შექმნილია საქართველოს რკინიგზაში დასაქმების, ინსტიტუციური მეხსიერების და კოლექტიური პრაქტიკების ფონზე, არ არის მხოლოდ ტექნიკური თუ სტრუქტურული მოვლენა, არამედ სიღრმისეულად სოციალური და ფსიქოლოგიური ფენომენია. ეს გარემოებები მნიშვნელოვან გავლენას ახდენს მიმდინარე რეორგანიზაციის პროცესებზე და განსაზღვრავს, რატომ იჩენს ორგანიზაცია როგორც გამძლეობას, ისე წინააღმდეგობას ცვლილებების მიმართ.

ინსტიტუციური მეხსიერების ორმაგი როლი იკვეთება როგორც ორგანიზაციული სტაბილურობის წყაროდ, ისე ტრანსფორმაციული გამოწვევის ბარიერად. მართვადი, ფორმალიზებული ცოდნის და პრაქტიკის გარეშე, რკინიგზაში მრავალთაობიანი დასაქმება ქმნის შენარჩუნების მექანიზმს, რომელიც უზრუნველყოფს ფუნქციური ცოდნის, სამუშაო ცოდნის და კოლექტიური ნორმების გაუნყვეტლობას. ამ ცალკეულ ასპექტზე ორგანიზაციული პროცესი ხშირად არის ეფექტიანი, რადგან არ ხდება ოპერაციული ცოდნის დაკარგვა თაობათა შორის. მეორე მხრივ, ეს ინსტიტუციური მეხსიერება ხშირად იქცევა ცვლილებების წინააღმდეგობის წყაროდ ის აფერხებს სწრაფ, მოქნილ და ადაპტირებულ პროსტრუქტურულ ინტერვენციებს, რადგან ცვლილებები ხშირად განიხილება როგორც წარსულის გამოცდილების დავინწყება ან უარყოფა (მაგ., იერარქიული დასაქმების ნორმები, სამუშაო ტრადიციები, შრომითი ურთიერთობების სტაბილურობა).

ემოციური კაპიტალი რკინიგზაში ხშირად მოქმედებს როგორც ორივე რესურსი და ბარიერი ოპტიმიზაციისთვის. ერთის მხრივ, ძლიერი ლოიალობა და კოლექტიური იდენტიფიკაცია ზრდის თანამშრომელთა ჩართულობას და შეიძლება დაეხმაროს სტაბილურობის შენარჩუნებას ორგანიზაციულ ცვლილებებში. თანამშრომლები, რომლებმაც განვითარების პროცესში ვერ იცვლიან ორგანიზაციული იდენტობის მაჩვენებლებს, გარკვეულწილად უზრუნველყოფენ უწყვეტობას. მეორეს მხრივ, როდესაც ემოციური კავშირი მწვავედ არის დაკავშირებული წარსულ გამოცდილებასთან და რკინიგზაში გატარებულ წლებთან, ცვლილებების ბოიკოტირების ფენომენი უფრო გამძაფრებულია. მაგალითად, 2025 წელს მიმდინარე ოპტიმიზაციის პროცესში საქართველოს რკინიგზის გენერალური დირექტორის ლაშა აბაშიძის მიერ გამოცხადებული ინიციატივები, რომლებიც მიმართულია სავაგონო და სალოკომოტივო პარკის განახლებაზე და დაზოგილი თა-

ნების რეინვესტიციაზე კონკრეტულ სერვისებზე, ინვესტ თანამშრომელთა შფოთვის საკუთარი სამუშაო სივრცის ცვლილების მიმართ, რაც ასახავს ემოციური კაპიტალის როგორც ბარიერის ფუნქციას (ლ. აბაშიძე, 2025) . თუმცა დროში განვირგნოდა ახალი ტექნოლოგიური პროცესების დანერგვა და შემდგომი სწავლების პროცესი მათ პროფესიულ განვითარებასა და ფინანსურ დანაზოგს შეუწყობს ხელს.

სტრუქტურული ცვლილებების მიმართ წინააღმდეგობა საქართველოს რკინიგზაში გამოიხატება არა მხოლოდ ინდივიდუალური აღქმებისა და შეშფოთებების დონეზე, არამედ საზოგადოებრივი დისკურსისა და პოლიტიკური პროცესების ფარგლებში, სადაც ცვლილებებისადმი დამოკიდებულება ფუნქციონირებს როგორც ინდიკატორი და ინტეგრირდება ფართო სოციალურ დებატებსა და პოლარიზაციულ დინამიკაში. (მიუხედავად იმისა, რომ არ არსებობს პირდაპირი სტატისტიკური გამოხმაურება, სოციალური რეაქციები იცვლება პოლიტიკურ თუ ეკონომიკურ კონტექსტში და ხშირად აისახება რკინიგზის როლზე საზოგადოებრივ ცნობიერებაში). ამდენად, სტანდარტული რეორგანიზაციის მოდელები, რომლებიც ეფუძნებიან მხოლოდ ეფექტიანობის ზრდას და სტრუქტურული ბიუჯეტის შემცირებას, ვერ ხსნიან სიღრმისეულ სოციალურ და ემოციურ ელემენტებს, რომლებიც განსაზღვრავენ შრომითი იდენტობის რღვევას ან შენარჩუნებას. სტანდარტული მოდელები ხშირად უგულებელყოფენ ორგანიზაციული კულტურისა და სოციალური ქსელის გავლენას, რაც რკინიგზის კონტექსტში განსაკუთრებით არის გამოხატული და ქმნის წინააღმდეგობას ცვლილებების მიმართ, რომელიც არა მხოლოდ ფინანსურ ან ოპერაციულ მიზნებს უკავშირდება, არამედ სპეციფიკური, იერარქიული და ისტორიული პროფესიული იდენტობის საკითხს.

სტანდარტული რეორგანიზაციის მოდელებსა და ისტორიულად ჩანერგილი საჯარო ორგანიზაციების სოციალურ-ინსტიტუციურ რეალობებს შორის შეუსაბამობის კონკრეტული ილუსტრაციად შეგვიძლია განვიხილოთ საქართველოს რკინიგზაში ბოლო დროს განვითარებული პოლიტიკური მოვლენები. საერთაშორისო რკინიგზის მმართველობის კონტექსტში, ევროკავშირის დირექტივა 2012/34/EU რომელსაც ხშირად „34-ე დირექტივასაც“ უწოდებენ ადგენს ერთიან ევროპულ რკინიგზის სივრცეს, რომელიც ითვალისწინებს რკინიგზის ინფრასტრუქტურაზე არადისკრიმინაციულ წვდომას და ჰარმონიზებულ მარეგულირებელ ჩარჩოებს წევრ სახელმწიფოებში. დირექტივა აერთიანებს და ცვლის ინფრასტრუქტურის მართვის, ლიცენზირებისა და წვდომის რეჟიმების მარეგულირებელ ადრინდელ წესებს, რომლის მიზანია კონკურენციის სტიმულირება, ბაზრის ზედამხედველობის გაძლიერება და საინვესტიციო პირობების გაუმჯობესება ევროპის რკინიგზის სექტორში. 2023 წლის ბოლოს საქართველოს მთავრობამ **EU Directive 2012/34/** ევროპარლამენტისა და საბჭოს 2012 წლის 21 ნოემბრის დირექტივის შესაბამისად გამოაცხადა მასშტაბური რესტრუქტურირების ინიციატივა, რომელიც 2024 წელს ამოქმედდებოდა და რომელიც ითვალისწინებდა ადრინდელი ერთიანი სახელმწიფო რკინიგზის კომპანიის სამ განსხვავებულ იურიდიულ და ოპერატიულ ერთეულად გარდაქმნას, რომლებიც პასუხისმგებლნი იქნებოდნენ ინფრასტრუქტურის მართვაზე, სატვირთო ოპერაციებსა და მგზავრთა მომსახურებაზე. სექტორული ლიბერალიზაციის ეს მიდგომა ზოგადად შეესაბამება ეფექტურობაზე ორიენტირებულ რეფორმის ჩარჩოებს, რომლებიც ხაზს უსვამენ ფუნქციურ გამიჯვნას, ბაზრის კონკურენციას და ოპერაციული პასუხისმგებლობების განაწილებას. თუმცა, როგორც ამ კვლევის ემპირიული შედეგები მიუთითებს, ასეთი ტექნიკური დაყოფა შესაძლოა საკმარისად არ ითვალისწინებდეს ორგანიზაციის წევრების ემოციურ მიჯაჭვულობას, თაობათაშორის უწყვეტობას და ჩანერგილ პროფესიულ იდენტობას.

შესაბამისად, ეს შემთხვევა ხაზს უსვამს დაძაბულობას გარე რეფორმის მოდელებს შორის, რომლებიც პრიორიტეტს ანიჭებენ სტრუქტურულ ეფექტურობას და ინსტიტუციურ მეხსიერებას. ასევე ემოციურ კაპიტალში ფესვგადგმულ შიდა ორგანიზაციულ დინამიკას. პრაქტიკაში, თანამშრომლები 2024 წლის რესტრუქტურირებას განმარტავენ არა მხოლოდ ადმინისტრაციულ რეკონფიგურაციად, არამედ მემკვიდრეობით მიღებული პროფესიული იდენტობისა და

სოციალური ერთიანობის პოტენციურ დარღვევად. ეს დინამიკა ხაზს უსვამს იმ არგუმენტს, რომ რეფორმებმა, რომლებიც არ არის დაფუძნებული ორგანიზაციული ცხოვრების სოციალურ და აფექტურ განზომილებებზე, შეიძლება გამოიწვიოს წინააღმდეგობა ან გაუთვალისწინებელი შედეგები, რითაც შეიზღუდება ტექნიკური რეორგანიზაციის მოსალოდნელი ეფექტურობის ზრდა.

განსაკუთრებული მნიშვნელობა აქვს საქართველოს რკინიგზის შემთხვევის შედარებით ინტერპრეტაციას სხვა პოლიტიკურ თუ ინფრასტრუქტურულ ორგანიზაციებთან. მაგალითად, საერთაშორისო კვლევები მიუთითებენ, რომ სახელმწიფო კომპანიებში ძლიერი ინსტიტუციური მეხსიერება და დასაქმების სტაბილურობა ხშირად არის დადებითი ფენომენი, რომელიც ხელს უწყობს სტაბილურობასა და რბილ ტრანსფორმაციებს, თუმცა ამავე კვლევები ხაზს უსვამენ, რომ სტანდარტული რეკომენდაციები ფოკუსირდება ტექნიკურად მიმართვებზე და არა სოციალური იდენტობისა და კულტურული ელემენტების ინტეგრაციაზე, რაც წარმოადგენს კრიტიკულ სადისკუსიო პუნქტს რკინიგზის კონტექსტში.

ამრიგად, საქართველოს რკინიგზის შემთხვევა ნათლად აჩვენებს, რომ შემდეგი ორგანიზაციული ოპტიმიზაცია უნდა იყოს უფრო სინთეზური მიდგომის საფუძველზე, სადაც ინსტიტუციური მეხსიერება და ემოციური კაპიტალი არ იქნება მხოლოდ განხილვის ობიექტი, არამედ ოპტიმიზაციის აქტიური კომპონენტი, რათა ცვლილებების პროცესი არ შეიქმნას როგორც სოციალური დისონანსი, არამედ ერგოს გრძელვადიანი თანამშრომლობისა და სამუშაო იდენტობის გარდაქმნის კონსტრუქციებს.

კვლევის შედეგები ცხადყოფს, რომ საქართველოს რკინიგზაში მიმდინარე და დაგეგმილი ოპტიმიზაციისა და რეორგანიზაციის პროცესები საჭიროებს პოლიტიკისა და მენეჯმენტის ისეთი ჩარჩოს ჩამოყალიბებას, რომელიც გასცდება სტანდარტულ ტექნოკრატიულ მიდგომებს და გაითვალისწინებს ორგანიზაციის სოციალურ, ემოციურ და ისტორიულ განზომილებებს. აღნიშნული რეკომენდაციები ეფუძნება იმ დასკვნას, რომ ინფრასტრუქტურული სახელმწიფო ორგანიზაციები, განსაკუთრებით მრავალთაობიანი დასაქმების ტრადიციის მქონე სტრუქტურები, ვერ ექვემდებარება მხოლოდ უნივერსალურ მენეჯერულ მოდელებს მათი სოციალური არქიტექტურის გაუთვალისწინებლად.

აღამიანზე ორიენტირებული ოპტიმიზაციის მოდელის დანერგვა წარმოადგენს ფუნდამენტურ წინაპირობას ცვლილებების ეფექტიანობისთვის. ეს მიდგომა გულისხმობს ოპტიმიზაციის აღქმას არა მხოლოდ როგორც ხარჯების შემცირების ან სტრუქტურული გამარტივების პროცესს, არამედ როგორც აღამიანური კაპიტალის გადაფასებას და მისი როლის გაძლიერებას ორგანიზაციულ ტრანსფორმაციაში. საქართველოს რკინიგზის შემთხვევაში, სადაც თანამშრომელთა მნიშვნელოვანი ნაწილი ორგანიზაციას უკავშირდება არა მხოლოდ პროფესიული, არამედ ოჯახური და ემოციური იდენტობით, ოპტიმიზაციის პროცესის დეკონტექსტუალიზაცია ქმნის სოციალური გაუცხოების და წინააღმდეგობის მაღალ რისკს. შესაბამისად, აღამიანზე ორიენტირებული მოდელი უნდა ეფუძნებოდეს მონანიშნულებით მმართველობას, კომუნიკაციის გამჭვირვალე მექანიზმებს და ცვლილებების პროცესში თანამშრომელთა სუბიექტურ გამოცდილებაზე დაკვირვებას, რაც ზრდის ნდობას და ამცირებს რეორგანიზაციისადმი ემოციურ წინააღმდეგობას.

ინსტიტუციური მეხსიერების შენარჩუნება რეორგანიზაციის პროცესში უნდა განიხილებოდეს არა როგორც კონსერვატიული ბარიერი, არამედ როგორც სტრატეგიული რესურსი. კვლევის შედეგები აჩვენებს, რომ მრავალწლიანი პრაქტიკული ცოდნა, არაფორმალური სამუშაო ნორმები და პროფესიული ეთოსი ქმნის ორგანიზაციული გამძლეობის საფუძველს. რეორგანიზაციის პროცესში ამ მეხსიერების იგნორირება იწვევს ოპერაციული ცოდნის დაკარგვას და ზრდის სტრუქტურული რისკების ალბათობას. ამიტომ, რეკომენდებულია ინსტიტუციური მეხსიერების სისტემატიზაცია, როგორც ფორმალური დოკუმენტაციის, ისე მენტორობის, პროფესიული ისტორიების არქივიზაციისა და გამოცდილ თანამშრომელთა ჩართულობის გზით გადაწყვეტილების მიღების პროცესში. ამგვარი მიდგომა უზრუნველყოფს ცვლილებების უწყვეტობას და ამცირებს ორგანიზაციული დისკონტინუიტეტის საფრთხეს.

თაობათაშორისი გადაცემის ინსტიტუციონალიზაცია წარმოადგენს საქართველოს რკინიგზის ერთ-ერთ ყველაზე ნაკლებად ფორმალიზებულ, თუმცა სტრუქტურულად მნიშვნელოვან პროცესს. მრავალთაობიანი დასაქმება, რომელიც ამ კვლევაში გამოვლინდა როგორც ინსტიტუციური მექანიზმების გადაცემის ძირითადი მექანიზმი, დღეს ძირითადად ფუნქციონირებს არაფორმალურ დონეზე ოჯახური ნარატივების, პროფესიული მაგალითების და ყოველდღიური პრაქტიკის მეშვეობით. პოლიტიკის დონეზე მიზანშეწონილია ამ პროცესის ინსტიტუციონალიზაცია სპეციალური პროგრამების, სტაჟირების მოდელების, მენტორ-მოსწავლე სისტემების და ცოდნის გადაცემაზე ორიენტირებული შიდა პლატფორმების შექმნით. ეს არა მხოლოდ შეინარჩუნებს ორგანიზაციულ ცოდნას, არამედ ხელს შეუწყობს ახალგაზრდა თაობის ინტეგრაციას იმგვარად, რომ ისინი არ აღმოჩნდნენ წინააღმდეგობაში არსებულ პროფესიულ იდენტობასთან.

სოციალური რისკების მინიმიზაცია წარმოადგენს კრიტიკულ მიმართულებას ოპტიმიზაციის პოლიტიკაში. კვლევამ აჩვენა, რომ სტრუქტურული ცვლილებები საქართველოს რკინიგზაში ხშირად აღიქმება როგორც სოციალური სტატუსის, პროფესიული ღირსებისა და ოჯახური მემკვიდრეობის დაკარგვის საფრთხე. აღნიშნული აღქმა ზრდის კოლექტიურ დაუცველობას და აძლიერებს ცვლილებების მიმართ წინააღმდეგობას. შესაბამისად, სოციალური რისკების მართვა უნდა მოიცავდეს არა მხოლოდ კომპენსაციის ან დასაქმების ალტერნატიული გზების შეთავაზებას, არამედ ფსიქოსოციალურ მხარდაჭერას, წინასწარ კომუნიკაციას და გარდამავალი პერიოდების ადეკვატურ დაგეგმვას. სოციალური ზემოქმედების შეფასება (Social Impact Assessment) უნდა გახდეს რეორგანიზაციის სავალდებულო კომპონენტი, რათა ცვლილებები არ იქცეს სოციალური დესტაბილიზაციის წყაროდ.

საბოლოოდ, პოლიტიკისა და მენეჯმენტის რეკომენდაციები მიუთითებს, რომ საქართველოს რკინიგზის ოპტიმიზაცია უნდა ეფუძნებოდეს ინტეგრირებულ მიდგომას, სადაც ტექნიკური ეფექტიანობა, ინსტიტუციური მექანიზმები და ადამიანური ფაქტორი განიხილება როგორც ურთიერთდამოკიდებული ელემენტები. მხოლოდ ამგვარი სინთეზური ხედვა შექმნის პირობებს, რომ რეორგანიზაცია არ იყოს აღქმული როგორც იდენტობის ნგრევა, არამედ როგორც ორგანიზაციული ევოლუციის ლეგიტიმური და სოციალურად მდგრადი პროცესი.

დასკვნა

წარმოდგენილმა კვლევამ აჩვენა, რომ საქართველოს რკინიგზა წარმოადგენს არა მხოლოდ ტრანსპორტისა და ლოგისტიკის სტრატეგიულ ინფრასტრუქტურას, არამედ სიღრმისეულ სოციალურ ინსტიტუტს, რომლის ფუნქციონირებაც მნიშვნელოვნად არის განპირობებული ინსტიტუციური მექანიზმებით, ემოციური კაპიტალითა და მრავალთაობიანი დასაქმების პრაქტიკით. კვლევის ძირითადი მიგნებები ცხადყოფს, რომ რკინიგზაში არსებული პროფესიული იდენტობა ხშირად სცდება ინდივიდუალური კარიერის ჩარჩოებს და ყალიბდება როგორც კოლექტიური და ოჯახური თვითაღქმის ნაწილი, რაც განაპირობებს ორგანიზაციის მიმართ განსაკუთრებულ ლოიალობასა და ცვლილებებისადმი სენსიტიურ დამოკიდებულებას. მრავალთაობიანი დასაქმება, რომელიც ზოგ შემთხვევაში საუკუნეებს გადაჭარბებულ საერთო საოჯახო სტაჟს მოიცავს, იკვეთება როგორც ინსტიტუციური მექანიზმების გადაცემის ერთ-ერთი უმთავრესი მექანიზმი, თუმცა ამავე დროს ქმნის სტრუქტურული ინერციის პირობებს, რაც ართულებს სწრაფ და სტანდარტიზებულ რეორგანიზაციის მოდელების დანერგვას.

თეორიულ დონეზე კვლევა ავითარებს ინსტიტუციური მექანიზმების კონცეფციას ინფრასტრუქტურული სახელმწიფო ორგანიზაციების კონტექსტში და აჩვენებს, რომ იგი ფუნქციონირებს ორმაგად, როგორც ორგანიზაციული გამძლეობის რესურსი და როგორც ცვლილებების მიმართ პოტენციური ბარიერი. ემოციური კაპიტალის ანალიზი ავსებს არსებულ ლიტერატურას იმ თვალსაზრისით, რომ სახელმწიფო და სტრატეგიულ ორგანიზაციებში ემოციური კავშირი არ არის მხოლოდ ინდივიდუალური მოტივაციის ფაქტორი, არამედ კოლექტიური მმართველობის დინამიკის განმსაზღვრელი ელემენტი. ამგვარად, კვლევა თეორიულად ამყარებს იმ პოზიციას, რომ

ორგანიზაციული ცვლილებების ანალიზი ვერ იქნება სრულფასოვანი სოციალური და კულტურული განზომილებების ინტეგრაციის გარეშე.

პრაქტიკული თვალსაზრისით, კვლევა მნიშვნელოვან წვლილს სთავაზობს პოლიტიკის შემუშავებებსა და მენეჯმენტს, განსაკუთრებით იმ კონტექსტში, სადაც მიმდინარეობს სტრუქტურული ოპტიმიზაცია და რეორგანიზაცია. დასკვნები მიუთითებს, რომ საქართველოს რკინიგზის მსგავსი ორგანიზაციებისთვის ოპტიმიზაციის წარმატება დამოკიდებულია ადამიანზე ორიენტირებული მიდგომების დანერგვაზე, ინსტიტუციური მექანიზმების მიზანმიმართულ შენარჩუნებასა და თაობათაშორისი ცოდნის გადაცემის ფორმალიზებაზე. კვლევა ადასტურებს, რომ სტანდარტული რეორგანიზაციის მოდელების მექანიკური გადმოტანა, ორგანიზაციის სოციალური არქიტექტურის გაუთვალისწინებლად, ზრდის სოციალური რისკებისა და წინააღმდეგობის ალბათობას და ამცირებს ცვლილებების ეფექტიანობას.

მომავალი კვლევებისათვის პერსპექტიულ მიმართულებად იკვეთება საქართველოს რკინიგზის შემთხვევის შედარებითი ანალიზი სხვა პოსტსაბჭოთა ან ევროპული სახელმწიფო ინფრასტრუქტურული ორგანიზაციების კონტექსტში, რაც საშუალებას მისცემს კვლევას გამოავლინოს ინსტიტუციური მექანიზმებისა და ემოციური კაპიტალის განსხვავებული მმართველობითი მოდელები. ასევე მნიშვნელოვანია რაოდენობრივი მეთოდების ინტეგრაცია, რაც შესაძლებელს გახდის ემოციური კავშირის, ლოიალობისა და ცვლილებების მიმართ დამოკიდებულებების სტატისტიკურ შეფასებას. დამატებით, მომავალი კვლევები შეიძლება ფოკუსირდეს თაობათაშორისი დასაქმების ტრანსფორმაციაზე თანამედროვე შრომითი ბაზრის პირობებში და გაანალიზოს, როგორ იცვლება შრომითი მემკვიდრეობის როლი ტექნოლოგიური და ინსტიტუციური გარდაქმნების ფონზე.

საერთო ჯამში, კვლევა ადასტურებს, რომ საქართველოს რკინიგზის ოპტიმიზაცია და რეორგანიზაცია ვერ იქნება მხოლოდ ტექნიკური ან ფინანსური ამოცანა; იგი წარმოადგენს კომპლექსურ სოციალურ პროცესს, რომლის წარმატება დამოკიდებულია ისტორიული მექანიზმების, ემოციური კაპიტალისა და ადამიანური გამოცდილების გააზრებულ და სტრატეგიულ ინტეგრაციაზე ორგანიზაციულ პოლიტიკაში.

გამოყენებული ლიტერატურა:

1. Abashidze, L. (2025). *Structural optimization and investment priorities in Georgian Railway*. Georgian Railway official statements and public communications.
2. Assmann, J. (2011). *Cultural memory and early civilization: Writing, remembrance, and political imagination*. Cambridge University Press.
3. Bourdieu, P. (1986). The forms of capital. In J. Richardson (Ed.), *Handbook of theory and research for the sociology of education* (pp. 241–258). Greenwood.
4. Casey, A. J., & Olivera, F. (2011). Reflections on organizational memory and forgetting. *Journal of Management Inquiry*, 20(3), 305–310. <https://doi.org/10.1177/1056492611407909>
5. Coraiola, D. M., Foster, W. M., & Suddaby, R. (2015). Varieties of history in organization studies. *Academy of Management Review*, 40(4), 513–534. <https://doi.org/10.5465/amr.2014.0203>
6. Dacin, M. T., Munir, K., & Tracey, P. (2010). Formal dining at Cambridge colleges: Linking ritual performance and institutional maintenance. *Academy of Management Journal*, 53(6), 1393–1418. <https://doi.org/10.5465/amj.2010.57318388>
7. Fineman, S. (2008). *The emotional organization: Passions and power*. Blackwell Publishing.
8. Halbwachs, M. (1992). *On collective memory*. University of Chicago Press.
9. Hochschild, A. R. (1983). *The managed heart: Commercialization of human feeling*. University of California Press.
10. Kahn, W. A. (1990). Psychological conditions of personal engagement and disengagement at work. *Academy of Management Journal*, 33(4), 692–724. <https://doi.org/10.5465/256287>

11. Nelson, R. R., & Winter, S. G. (1982). *An evolutionary theory of economic change*. Harvard University Press.
12. Schein, E. H. (2010). *Organizational culture and leadership* (4th ed.). Jossey-Bass.
13. Stiglitz, J. E. (2002). *Globalization and its discontents*. W. W. Norton & Company.
14. Walsh, J. P., & Ungson, G. R. (1991). Organizational memory. *Academy of Management Review*, 16(1), 57–91. <https://doi.org/10.5465/amr.1991.4278992>
15. Zerubavel, E. (1996). Social memories: Steps to a sociology of the past. *Qualitative Sociology*, 19(3), 283–299. <https://doi.org/10.1007/BF02393273>
16. Davit Sidamonidze. *Georgian Railway as Part of the South Caucasus Transport Corridor*
17. Bakar Getsadze & Avtandil Sharvashidze. *Development of an Innovative Method of Train Traffic Safety Control on Georgian Railways in Parallel with the Formation of a Safety Culture*
18. Davit Gondauri & Manana Moistsrapishvili. *Development of Railway Silk Road as a Platform for Promoting Georgia's Economic Growth*
19. Davit Gondauri & Manana Moistsrapishvili. *Statistical and Financial Analysis of Georgian Railway's Main Performance Indicators in 2006–2019*
20. Giuli Giguashvili & Mariam Sadagashvili. *The Role of Georgia in the Middle Corridor of the Ancient and Modern Silk Road*
21. Georgian Railways. (2023). Annual Report. Tbilisi.
22. Georgian Railways. (2024). Concept of Organizational Reform and Structural Optimization. Internal Document. Tbilisi.
23. Georgia Today. (2023, October 12). Restructuring and subsidies: Georgia's railways to be transformed in 2024. <https://georgiatoday.ge/restructuring-and-subsidies-georgias-railways-transformation-in-2024/>
24. BM.ge. (2023, October 12). From 2024, Georgian Railways to become three companies – reform details. <https://bm.ge/news/2024-tslidan-saqartvelos-rkinigza-sam-kompaniad-gaiyofa-reformis-detalebi>

GEORGIAN RAILWAY AS INSTITUTIONAL MEMORY: EMOTIONAL ATTACHMENT, MULTIGENERATIONAL EMPLOYMENT, AND STRUCTURAL OPTIMIZATION

Zurab Nasaraia

Doctor of Public Administration

Associate Professor, Georgian Technical University

Teimuraz Tvildiani

Candidate of Technical Sciences

RESUME

This study examines Georgian Railway as an organization that carries and reproduces institutional memory, where multigenerational employment and emotional attachment play a significant role in shaping organizational identity and perceptions of structural optimization. The research is based on the premise that organizational change in state-owned infrastructure institutions cannot be understood solely through technical or economic perspectives when such organizations are characterized by long-term historical continuity and dense social ties.

The study adopts a qualitative research design, including in-depth interviews with representatives of multigenerational railway families, narrative and thematic analysis, and the examination of documentary and institutional sources. The empirical findings indicate that multigenerational employment functions as a key mechanism for the transmission of institutional memory, reinforcing emotional attachment and loyalty to the organization while simultaneously increasing resistance to structural change.

The study highlights the dual role of institutional memory and emotional capital as both resources for organizational stability and potential barriers to reorganization. It argues that standard optimization models often fail to account for these social and emotional dimensions, thereby limiting their effectiveness. The article concludes that a human-centered optimization model that integrates institutional memory and emotional capital provides a more sustainable and legitimate foundation for organizational transformation.

Keywords: Georgian Railway, institutional memory, emotional capital, multigenerational employment, organizational identity, structural optimization, infrastructure.